

Christoph, Dompropst zu Halberstadt, und Heinrich, Gebrüder, Grafen zu Stolberg, an den Prinzen Wilhelm von Oranien.

Durchleuchtiger vnd hochgebornner furst. Ewr gnaden seind vnsser willige vnd geullessene dienst mit vleiss zuuorn. Gnediger herr. E. g. ahn vns beyden gethanes schreiben, darinnen sie vns vermelden, dass e. g. durch schickung dess Almechtigen vnd gehabtem rath E. g. freunden sich mit der durchleuchtigen hochgebornenn furstin freylen Annen, gebornne hertzogin zu Sachsen, weyland hertzogk Morits seligen nachgelassene dochter, ehelich vermhalet vnd demnach in willens sein, vf Montag nach Bartholomey den 25. Augusti schirsten in der stat Leiptzigk beylager zuhalten, mit begeren, dass wir den 20 desselbigen bey E. g. zu Northausen erscheinen vnd forder von dannen nach Leiptzigk verreisen vnd alda E. g. ehren tag leisten helffen wollen, haben wir dienstlichen entpfangen, dess inhalt verlesen vnd E. g. schriftlich vnd loblich vornhemen gantz gerne vernhomen vnd hochlich erfreuet seindt. Wunschen auch, E. g. hirtzu von Gott seggen vnd alle deien, vnd erkennen vnss vf dasselbige E. g. begeren dienstlich zu gehorsamen schuldich, wollen auch geliepts Got, wo vns andere hohe zufelle nicht verhindernen, vf die tzeyt bey E. g. zu Northausen erscheinen vnd forder mit E. g. nach Leiptzigk reisen. Wir werden auch niemandt sunders mit vns bringen dan vnser hofgesinde, Wir brachten dan ein par jungen Grauen von Gleichen mit vnss. Idoch wollen wir vber 36 pferde nicht mitbringen. Welchs E. g. wir dienstlich nicht wollen verhalten vnd E. g. jdertzeyt zu dienen, finden sie vnss gantz willig vnd beflissen.

Datum Wernigerode den 7. Julij, Ao. etc. 61.

Christoph, Dhumbprobst zu Halberstad,
vnd Heinrich gebruder, grafen zu
Stolbergk, Koenigstein vnd Rutzschfort etc.

Dem durchleuchtigen vnd hochgebornem fursten vnd
hern, hern Wilhelm, Printz tzu Vranien, grafe zu Nassau,
Catzenelbogen, Vianden vnd Dietz, herr tzu Breda,
ritter dess ordens dess goldenen Fliess, Stathalter vnd
Capitan general in Hollandt, Sehelandt, Burgundj vnd
Vtrecht etc., vnserm gnedigen hern.

Arch. Nr. 2123 K. H. - Arch. im Haag.